

**Votaziun dal pievel dals  
17 da matg 2009  
Explicaziuns dal cussegl federal**

**1 Artitgel constituzional  
«In futur cun la medischina  
cumplementara»**

(untraproject tar l'iniziativa dal pievel  
«Gea a la medischina cumplementara»  
ch'è vegnida retratga)

**2 Introducziun da datas  
biometricas electronicas  
en il passaport svizzer  
ed en documents da viadi  
per persunas estras**

(midada da la lescha federala davart las  
persunas estras)



Schweizerische Eidgenossenschaft  
Confédération suisse  
Confederazione Svizzera  
Confederaziun svizra



## Davart quai vegni votà

**Artitgel constituziunal «In futur cun la medischina cumplementara»** (cuntraproject tar l'iniziativa dal pievel «Gea a la medischina cumplementara» ch'è vegnida retratga)

Emprim  
project

Il parlament ha elavurà in artitgel constituziunal sco cuntraproject tar l'iniziativa dal pievel «Gea a la medischina cumplementara». Il nov artitgel pretendà che la confederaziun e ch'ils chantuns tegnian quint da la medischina cumplementara en il rom da lur cumpetenzas. Suenter che l'iniziativa dal pievel è vegnida retratga, decidan il pievel ed ils chantuns davart il cuntraproject.

Il parlament ed il cussegl federal recumondan d'acceptar quest project.

Infurmaziuns davart quest project

paginas 4–11

Text da votaziun

pagina 8

**Introducziun da datas biometricas electronicas en il passaport svizzer ed en documents da viadi per persunas estras**  
(midada da la lescha federala davart las persunas estras)

Segund  
project

Sin l'entir mund introduceschan adina dapli stadis passaports biometrics cun datas ch'èn registradas en moda electronica, ils uschenumnads passaports electronics. Per garantir er en l'avegnir la libertad da viagiar da las Svizras e dals Svizzers e per tegnair il passaport svizzer er vinavant sin in aut nivel da segirezza, han il cussegl federal ed il parlament concludì d'introducir definitivamain il passaport electronic er en Svizra. Las normas ch'èn liantas per ils stadis da Schengen vegnan uschia realisadas er en ils passaports svizzers.  
Cunter quest conclus federal èsi vegnì fatg in referendum.

Infurmaziuns davart quest project

paginas 12–21

Text da votaziun

paginas 22–28

## **Artitgel constituzional**

### **«In futur cun la medischina cumplementara»**

(cuntraproject tar l'iniziativa dal pievel «Gea a la medischina cumplementara» ch'è vegnida retratga)

#### **La dumonda da votaziun sa cloma:**

Vulais Vus acceptar l'**artitgel constituzional «In futur cun la medischina cumplementara»?** (cuntraproject tar l'iniziativa dal pievel «Gea a la medischina cumplementara» ch'è vegnida retratga)

#### **Il cussegli federal ed il parlament recumondan d'acceptar l'artitgel constituzional.**

Il cussegli naziunal ha acceptà il project da votaziun cun 152 cunter 16 vuschs e cun 24 abstensiuns,  
il cussegli dals chantuns cun 41 cunter 0 vuschs e cun 2 abstensiuns.

## Il pli important en furma concisa

L'iniziativa dal pievel «Gea a la medischina cumplementara» pretendeva che la confederaziun e ch'ils chantuns procurian – en il rom da lur cumpetenzas – ch'i vegnia tegnì quint en moda cumplessiva da la medischina cumplementara. Dal text da l'iniziativa sez na resultava dentant betg, tge ch'i saja manegià cun quai. La maioritad dal parlament ha refusà l'iniziativa, perquai ch'ella era memia intscherta, perquai ch'ella gieva memia lunsch u perquai ch'ella na pareva betg dad esser necessaria.

Il parlament  
refusa l'iniziativa  
dal pievel...

A chaschun da las tractativas ha il parlament dentant concludì da proponer in cuntraproject tar l'iniziativa. Il parlament vul francar expressivamain en la constituziun ch'i vegnia tegnì quint da la medischina cumplementara en il sistem da sanedad svizzer. Cuntrari a l'iniziativa na duai quai dentant betg vegnir fatg en moda cumplessiva.

...e propona  
in cuntraproject

Il parlament è da l'avis ch'il sistem da sanedad svizzer stoppia tegnair meglier quint da la medischina cumplementara che fin ussa. Co che quai duai vegnir fatg, na respunda er il cuntraproject betg. En cas che l'artitgel constituzional vegniss acceptà, stuess il parlament perquai determinar, tge mesiras concretas che duessan vegnir prendidas a favur da la medischina cumplementara e tge secturs dal sistem da sanedad che fissan pertutgads.

Tegnair quint  
da la medischina  
cumplementara

En il parlament hai dà er vuschs criticas visavi il cuntraproject. Igl è cunzunt vegnì critigà ch'i na saja betg necessari da francar la medischina cumplementara en la constituziun, perquai ch'i possia gia oz vegnir tegnì quint adequatamain da tala. Plinavant existia il privel che la medischina cumplementara vegnia privilegiada en cumparegliaziun cun la medischina scientifica, che na vegn betg menziunada en la constituziun.

Critica visavi  
il cuntraproject

Per il cussegl federal n'avessi betg duvrà ina disposizion constituziunala a favur da la medischina cumplementara. Oz sustegna el dentant il cuntraproject dal parlament.

Posiziun dal  
cussegl federal

## Il project da votaziun en detagi

La Svizra ha in sistem da sanadad d'auto qualitat, e tras l'assicuranza obligatoria per la tgira da malsauns (assicuranza fundamentala) ha l'entira populaziun access a quest sistem.

Il sistem  
da sanadad  
svizzer actual

Quest sistem da sanadad sa basa principalmain sin las enconuschentschas e sin ils progress da la medischina scientifica moderna, l'uschenumnada medischina da scola. Tenor la lescha federala davart l'assicuranza da malsauns (LAM) po l'assicuranza fundamentala perquai surpigiliar ils custs per tractaments medicinals e per medicaments mo, sch'igl è cumprovà che quests tractaments e medicaments èn efficazis, adequats e rentabels.

Medischina  
scientificia

Daspera porschan bleras medias e blers medis sco er bleras terapeutas e blers terapeuts paramedicinals en Svizra prestaziuns da la medischina cumplementara. Questa purschida vegn tratga a niz d'ina gronda part da la populaziun svizra.

Medischina  
cumplementara

La medischina cumplementara vegn per part er designada sco medischina alternativa, empirica u tradiziunala. Ella cumiglia bleras differentas metodas da diagnosa, da terapia u da prevenziun. Quellas vegnan purschidas sco cumplettaziun u sco alternativa a la medischina scientificia.

En Svizra èn actualmain enconuscentas var 200 differentas metodas da la medischina cumplementara che vegnan pratigadas da bundant 20 000 terapeutas e terapeuts e da var 3000 medias e medis. Abstrahà d'intginas excepiuns, sco l'acupuncture medicinala u tscherts medicaments, na vegnan las prestaziuns da la medischina cumplementara betg surigliadas da l'assicuranza fundamentala. Tgi che vul far diever da questas prestaziuns, las sto perquai pajar sez u las finanziar tras in'assicuranza supplementara.

Tenor il nov artitgel constituziunal duain la confederaziun ed ils chantuns tegnair quint da la medischina cumplementara en il rom da lur cumpetenzas, cur ch'ella respectivamain els adempleschan las incumbensas dals fatgs da sanadad.

L'artitgel è formulà en moda fitg averta e n'inditgescha betg, co ch'i duai vegnir tegnì quint concretamain da la medischina cumplementara.

Sch'il cuntraproject vegn acceptà, vegnan perquai il parlament ed eventualmain il pievel a stuair decider, co che la medischina cumplementara po vegnir integrada meglier en il sistem da sanadad.

Il nov artitgel  
constituziunal

Mesiras  
concretas  
sin il stgalim  
da la lescha



## Text da votaziun

### Conclus federal davart l'iniziativa dal pievel «Gea a la medischina cumplementara» dals 3 d'october 2008

*L'assamblea federala da la confederaziun svizra,  
sa basond sin l'artitgel 139 alinea 3 da la constituziun federala<sup>1</sup>,  
suenter avair examinà l'iniziativa dal pievel «Gea a la medischina cumplementara»  
ch'è vegnida inoltrada ils 15 da settember 2005<sup>2</sup>,  
suenter avair gi invista da la missiva dal cussegl federal dals 30 d'avust 2006<sup>3</sup>,  
concluda:*

#### Art. 1

...<sup>4</sup>

#### Art. 2

<sup>1</sup> A la votaziun dal pievel e dals chantuns vegn suttamess in cuntraproject da l'assamblea federala «In futur cun la medischina cumplementara».

<sup>2</sup> Il cuntraproject mida la constituziun federala sco suonda:

*Art. 118a (nov) Medischina cumplementara*

En il rom da lur cumpetenzas procuran la confederaziun ed ils chantuns ch'i vegnia tegni quint da la medischina cumplementara.

#### Art. 3

L'assamblea federala recumonda al pievel ed als chantuns d'approvar il cuntraproject.

<sup>1</sup> CS 101

<sup>2</sup> fegl uffizial federal 2005 6001

<sup>3</sup> fegl uffizial federal 2006 7591

<sup>4</sup> L'iniziativa dal pievel è vegnida retratga. La votaziun dal pievel en chaussa n'ha betg lieu.

## Las tractativas en il parlament

Il cussegli federal ed il parlament han refusà l'iniziativa dal pievel «**Gea a la medischina cumplementara**», perquai ch'els eran da l'avis ch'ella gaja memia lunsch. Il parlament ha dentant concludì da proponer in cuntraproject tar l'iniziativa cun il titel «**In futur cun la medischina cumplementara**». Qua tras vul el rinforzar la medischina cumplementara e procurar ch'i vegnia tegnì meglier quint da la medischina cumplementara en il sistem da sanadad svizzer.

Il parlament ha refusà l'iniziativa dal pievel, perquai che sia pretensiun da tegnair quint en moda cumplessiva da la medischina cumplementara era memia intscherta e gieva memia lunsch. El ha dentant prendì l'iniziativa sco chaschun per françar en la constituziun che la confederaziun e ch'ils chantuns tegnian quint da la medischina cumplementara.

Il parlament è da l'avis che quai saja giustifitgà en vista al grond interess da la populaziun per la medischina cumplementara. Uschia duai vegnir renconuschì expressivamain il niz che bleras persunas tiran or da tractaments da la medischina cumplementara, er sch'il funcziunament da quests tractaments n'è betg adina scleri.

La discussiun parlamentara ha tractà cunzunt traïs secturs, en ils quals i duessan vegnir prendidas mesiras concretas suenter l'acceptaziun da l'artitgel constituziunal.

Fixaziun en la  
constituziun

Interess da la  
populaziun

Giavischs dal  
parlament

Intginas parlamentarias ed intgins parlamentaris vulevan integrar metodos efficazias da la medischina cumplementara en il catalog da prestaziuns da l'assicuranza fundamentala. Il parlament era per gronda part d'accord che er prestaziuns da la medischina cumplementara hajan da correspunder als criteris da l'efficacitad, da l'adequatezza e da la rentabilitad. En cas ch'i duessan dentant valair auters criteris per la medischina cumplementara u en cas che la cumprova da l'efficacitad duess vegnir furnida tenor in'autra procedura, stuess la lescha vegnir adattada correspudentamain.

Medischina  
cumplementara  
en l'assicuranza  
fundamental

In ulteriur quità ch'è vegnì exprimì differentas giadas concerna ils numerus medicaments da la medischina cumplementara. I dovria regulaziuns legalas che n'impedeschian betg la producziun, l'admissiun e la vendita da medicaments da la medischina cumplementara e che garanteschian lur disponibladad, lur segirezza e lur qualitad.

Medicaments  
da la medischina  
cumplementara

Er la meglieraziun da la protecziun da las pazientas e dals pazients sco er da las consumertas e dals consuments è vegnida pretendida pliras giadas. Cunquai ch'i na dettia oz en Svizra naginas scolaziuns reglamentadas e nagins diploms renconuschids en il sectur da la medischina cumplementara, saja quai praticamain nunpuissaivel da differenziar tranter terapeutas e terapeuts qualifitgads e nunqualifitgads. La protecziun da las pazientas e dals pazients sco er da las consumertas e dals consuments na saja betg dada uschia. Las scolaziuns stoppian perquai vegnir regladas sin plaun naziunal, i stoppian vegnir creads diploms federrals, e las permissiuns chan-tunalas per pratitgar la professiun stoppian vegnir armonisadas.

Protecziun da las  
pazientas e dals  
pazients sco er da  
las consumertas  
e dals consuments

Ina minoritad dal parlament è da l'avis ch'i na saja betg raschunaivel da fixar la medischina cumplementara en la constituziun. Quai na saja betg necessari, perquai ch'i possia vegnir tegnì quint gia oz da la medischina cumplementara e perquai che quai vegnia er gia fatg oz. Mesiras concretas a favur da la medischina cumplementara stuessan vegnir realisadas sin il plaun da la lescha. Sche la medischina cumplementara vegnia menziunada expressivamain en la constituziun, vegnia ella privilegiada en cumparegliaziun cun la medischina scientifica, che n'è betg francada en la constituziun.

Critica visavi  
il project

En la tractativa davart l'iniziativa dal pievel «Gea a la medischina cumplementara» è il cussegl federal s'exprimì cunter in cuntraproject sin il stgalim da la constituziun. El aveva las medemas resalvas sco la minoritad dal parlament e temeva ch'i resultassan custs supplementars en ils fatgs da sanadad, sche la medischina cumplementara vegniss francada en la constituziun. Malgrà questas resalvas sustegna il cussegl federal oz il cuntraproject dal parlament; en concordanza cun la revisiun da lescha federala davart ils dretgs politics na fa el betg in'autra recumandaziun per la votaziun che l'assamblea federala.

Posiziun dal  
cussegl federal

**Il parlament ed il cussegl federal recumondan d'acceptar il project «In futur cun la medischina cumplementara».**

## **Introducziun da datas biometricas electronicas en il passaport svizzer ed en documents da viadi per persunas estras**

(midada da la lescha federala davart las persunas estras)

### **La dumonda da votaziun sa cloma:**

Vulais Vus acceptar il conclus federal dals 13 da zercladur 2008 davart l'approvaziun e la realisaziun dal barat da notas tranter la Svizra e la communitad europeica concernent la surpigliada da l'ordinaziun (CE) nr. 2252/2004 davart **ils passaports ed ils documents da viadi biometrics** (svilup da l'acquist da Schengen)?

### **Il cussegl federal ed il parlament recumondan d'acceptar il project.**

Il cussegl naziunal ha acceptà il project da votaziun cun 94 cunter 81 vuschs e cun 12 abstensiuns,  
il cussegl dals chantuns cun 36 cunter 2 vuschs e cun 3 abstensiuns.

## **Il pli important en furma concisa**

Passa 50 stadis emettan gia passaports cun datas ch'èn regi-stradas en moda electronica (passaports electronics u biometrics) tenor standards internaziunals. Dapi l'avust 2006 èn ils stadis da Schengen obligads d'emetter mo pli passaports elec-tronics. L'ordinaziun correspundenta da la CE davart ils docu-ments d'identitad è relevanta er per la Svizra sco stadi ch'è associà a Schengen. Plinavant pon las Svizras ed ils Svizzers viagiar en l'avegnir senza visum en e tras ils Stadis unids mo, sche la Svizra emetta passaports electronics. Er la carta d'iden-titad sto vegnir renovada ils proxims onns. Sch'i duain vegnir registradas datas biometricas sin la carta d'identitad, n'è betg anc concludì. Quai vegn il cussegl federal a decider pli tard.

Dapi il settember 2006 emetta la Svizra passaports electronics en il rom d'in project da pilot temporar. Per l'introducziun defi-nitiva sto vegnir adattada la lescha vertenta davart ils docu-ments d'identitad. Quai permetta da registrar la fotografia e las improntas da dus dets en moda electronica en il passaport tenor las prescripziuns internaziunalas.

La lescha cuntegna disposiziuns severas per la protecziun da las datas registradas. Plinavant èsi scumandà er vinavant da duvrar la banca da datas dals documents d'identitad per intents d'investigazion. I n'è betg pussaivel da surveglier las burgaisas ed ils burgais cun agid dal nov passaport.

Cunter quest conclus federal ha in comité fatg in referendum. Quest comité fa valair ristgas da segirezza e vul ch'ins dastgia tscherner libramain tranter il passaport cun datas biometricas ed il passaport senza datas biometricas.

Il cussegl federal ed il parlament sustegnan l'introducziun defi-nitiva da passaports electronics. Cun il passaport svizzer duain ins pudair viagiar er en l'avegnir senza problems. Il conclus federal pussibilitescha plinavant da cuntinuar cun la participa-zion svizra a la collavuraziun da segirezza, da visums e d'asil sin basa da las cunvegneas da Schengen e da Dublin. Latiers tutgan er facilitaziuns per il traffic da persunas als cunfins naziunals.

Il passaports  
ston ademplir  
standards  
internaziunals

Ina nova  
regulaziun  
è necessaria

Regulaziun  
severa per la  
protecziun  
da datas

Opposiziun  
e quitads

Puntg da vista  
dal cussegl federal  
e dal parlament

## **Il project da votaziun en detagi**

Il conclus federal qua avant maun dat la pussaivladad da registrar las persunalias usitadas (num, prenum e.u.v.) sco er la fotografia e las improntas da dus dets sin in chip en il passaport svizzer. En cas da persunas sut 12 onns na veggan las improntas dals dets dentant betg registradas. Uschia veggan las normas internaziunalas actualas per ils documents da viadi realisadas er en Svizra. Var 50 pajais han gia fatg quai, a la fin da l'onn veggan quai probablaman ad esser passa 90 pajais.

Novas normas internaziunalas

### **Tge èn passaports electronics u biometrics?**

Indicaziuns biometricas en ils passaports n'èn nagut da nov. Ellas veggan duvradas da vegl ennà per pudair attribuir cleramain in document d'identitat a la possessura u al possessur legitim. Utilisadas veggan per exemplu la fotografia da la fatscha e la grondezza dal corp. Pli baud veggivan menziunadas er la colur dals egls e la colur dals chavels en il passaport.

Da nov veggan registradas supplementarmain la fotografia e las improntas da dus dets en moda electronica sin in chip da datas. Passaports biometrics veggan perquai er numnads passaports electronics. Gia passa 50 pajais emettan mo pli passaports electronics (stadi: schaner 2009), tranter quels er ils pajais vischins da la Svizra.

Las datas ch'èn registradas en il document d'identitat pon veggir legidas cun lecturs sin distanzas curtas, e quai mo, sch'il lectur enconuscha la dretga clav electronica. Las improntas dals dets èn segiradas cun in mecanism da protecziun supplementar. Tras questas mesiras da protecziun vegin evità che las datas veggian legidas nunvulidamain e nunautorisadamain, per exemplu sin distanza u en passond. Las datas en il nov passaport electronic èn ultra da quai segiradas uschia, ch'ellas na pon betg veggir manipuladas u copiadas («clonadas») inobservadament.

Il passaport 06 che vegn emess en Svizra dapi il settember 2006 è mo ina soluzion transitorica temporara. Il passaport electronic duai ussa vegnir introduci definitivamain. Quai ha ils suandants avantatgs:

Per l'ina vegn garantida la libertad da viagiar da las Svizras e dals Svizzers. L'introducziun da passaports electronics stgaf-fescha numnadaman tant la premissa per che las Svizras e per ch'ils Svizzers na stoppian er en l'avegnir betg dumandar in visum per far in viadi en e tras ils Stadis unids, sco er la premissa per che la Svizra na vegnia betg puspè exclusa dal territori da Schengen.

Per l'autra vegn il passaport svizzer protegi meglier cunter in'utilisaziun abusiva che las versiuns da passaports da fin ussa. Obtegnair in passaport tras fraud ed utilisar in passaport engulà u pers daventa bler pli difficil, perquai che la fotografia e las improntas dals dets vegnan legidas en moda electronica e pon vegnir cumparegliadas cun quellas da la persona che preschenta il passaport – saja quai en cas d'ina controlla da cunfin u a chaschun da la dumonda d'in nov passaport. Sche la Svizra – cuntrari als auters pajais – renunziass a questas pussaivladads, pudess il passaport svizzer vegnir falsifitgà e malduvrà pli e pli savens en l'avegnir.

Las datas electronicas en il passaport svizzer èn protegidas cunter falsificaziuns e cunter lecturas nunautorisadas. Las improntas dals dets per exemplèl èn protegidas spezialmain tras ina nova procedura: Per ch'in auter pajais possia insumma leger las improntas dals dets, sto el avoir l'autorisaziun da la Svizra. Il cussegl federal dat questa autorisaziun mo a quels pajais che han in nivel da protecziun da datas ch'è equivalent a la protecziun da datas svizra. El po dar questa autorisaziun er ad auters posts (per exemplèl a societads aviaticas) che ston controllar l'identidad da personas en l'interess public. Sche las pretensiuns da la protecziun da datas da la Svizra na vegnan betg ademplidas, retira il cussegl federal puspè l'autorisaziun da lectura.

Soluzion durabla  
e segira  
en l'interess  
da la libertad  
da viagiar

Garantir  
la qualitat  
e la segirezza  
dal passaport  
svizzer

Aut nivel  
da protecziun  
da datas

Per ch'ils documents d'identitat possian vegnir emess svelt e vegnir administrads en moda segira, sto i vegin documentà, tgi che ha survegnì tge document d'identitat cun tge datas. Il sistem d'infurmazion svizzer per documents d'identitat (ISA) garantescha quai dapi l'onn 2003. En il ISA èn registradas las persunalias sco er la fotografia da la possessura u dal possessur dal document d'identitat. En l'avegnir duain er las improntas dals dus dets vegnir integradas en il ISA. L'access al ISA è suttamess a reglas severas. Il conclus federal dat la permissiun d'access mo ad autoritads svizras, e quai mo per emetter e per controllar ils documents d'identitat. La suelta

Naginas  
investigaziuns  
cun agid da la  
banca da datas

### **Il passaport biometric e «Schengen/Dublin»**

La noziun frequenta «Schengen/Dublin» manegia duas cunvegas ch'en vegnidas fatgas en queste dus lieus tranter ils stadis da la UE.

Als cunfins tranter ils stadis da Schengen na datti naginas controllas sistematicas da persunas. Quai è d'avantatg per la libertad da viagiar. Da l'autra vart vegn augmentada la segirezza: Las controllas al cunfin exterior da Schengen vegnan rinforzadas, e la collavuraziun da la polizia e da la giustia vegn intensivada, tranter auter cun il sistem d'infurmaziun da Schengen (SIS). Er il passaport electronic gida ad augmentar la segirezza.

La cunvega da Dublin determinescha, tge stadi ch'è cumpetent per tractar ina dumonda d'asil. Uschia duai quai vegnir evità ch'ina dumonda vegnia fatga pliras giadas, ed ils sistems d'asil naziunals duain vegnir distgargiads.

La Svizra collaura al svilup dal dretg da Schengen. Sche la UE concluda novaziuns, sco per exemplu il passaport electronic, sto la Svizra decider, sch'ella vul surpigliar questas novaziuns. Sche la Svizra refusa quellas e sch'ella n'arriva betg da sa cunvegnir entaifer 90 dis ad ina soluziun cun tut ils 27 stadis da la UE, finescha la collavuraziun da Schengen/Dublin cun la Svizra.

excepziun è l'utilisaziun per identifitgar victimas d'accidents, da catastrofas da la natira e d'acts da violenza (p.ex. la catastrofa dal tsunami il december 2004). Per intents d'investigaziun na dastga il ISA dentant vegnir duvrà ni en Svizra ni a l'exterior. Autoritads estras n'hàn insumma betg access al ISA ed a las datas registradas.

La finala possibilitescha il conclus federal da surpigliar l'ordinaziun da la CE davart ils documents d'identitat ch'è relevanta per la Svizra. Questa ordinaziun pretenda ch'ils stadis da Schengen emettian – a partir da l'avust 2006 – mo pli pas-saports electronics. Sco stadi ch'è associà a Schengen sto la Svizra decider, sch'ella vul surpigliar quest svilup en la lescha naziunala davart ils documents d'identitat. Sch'ella refusa quai, exista il privel che las cunvegnas d'associaziun a Schengen/Dublin – cunvegnas ch'èn impurtantas per la Svizra – vegnissan abolidas.

Er ils documents d'identitat svizzers per las fugitives e per ils fugitivs renconuschids e per las persunas senza naziunalidad, ils uschenumnads documents da viadi per persunas estras, duain vegnir munids cun datas electronicas. Per questa categoria da documents d'identitat vegnan appligads ils medems standards tecnics sco per il passaport. Il conclus federal cumpiglia perquai er las midadas necessarias en la lescha federala davart las persunas estras.

Las datas dals documents d'identitat da las persunas estras, en spezial las fotografias e las improntas dals dets, vegnan registradas en ina banca da datas separada, il sistem d'infur-maziun per documents da viadi (ISR). Per questa banca da datas e per las datas ch'ella cuntegna valan las explicaziuns davart la banca da datas ISA confurm al senn.

Svilup dal dretg  
da Schengen

Er per fugitives,  
per fugitivs e per  
persunas senza  
naziunalidad

L'adattazion da la lescha davart ils documents d'identitat stgaffescha la baza legala per la registrazion electronica da datas biometricas en ils documents d'identitat svizzers. Quai duai vegnir realisà a partir dal 1. da mars 2010 per il passaport svizzer e per ils documents da viadi per persunas estras.

La carta d'identitat actuala na vegn betg adattada sin quest termin. Adattada vegn mo la procedura per emetter la carta d'identitat. Suenter in termin transitoric da maximalmain 2 onns vegnan ils chantuns – e betg pli las vischnancas – ad esser cumpetents per las dumondas. Davart ils ulteriurs svilups da la carta d'identitat sezza vegn il cussegl federal a decider pli tard, en spezial davart la dumonda, sche la carta d'identitat duaja cuntregnair datas biometricas u betg.

Er suenter l'introducziun d'in nov passaport mantegnan ils passaports actuals 06 ed ils passaports 03, ch'en vegnids emess dapi l'onn 2003, lur valaivladad, fin ch'els scadan en moda regulara. Tgi che ha in passaport, na sto pia betg procurar immediatamain in nov.

Ulteriuras infurmaziuns: [www.schweizerpass.admin.ch](http://www.schweizerpass.admin.ch)

Nagina decisiun  
davart la nova  
carta d'identitat

Ils passaports  
emess restan  
valaivels

## Ils arguments dal comité da referendum

### **NA al sforz da biometria per passaports svizzers e per cartas d'identidad svizras**

Il cussegl federal giustifitgescha il nov passaport cun la cunvegna da Schengen. **Ma là na vegni ditg cun betg in pled che las datas stoppian vegnir segiradas en ina banca da datas centrala. E là na vegni er betg ditg che la carta d'identidad stoppia vegnir emessa cun datas biometricas.** La Germania è sa decidida definitivamain cunter ina banca da datas centrala. En Germania po dal rest mintgina e mintgin decider, sch'ella u sch'el vul ina carta d'identidad cun u senza improntas biometricas. A las burgaisas ed als burgais svizzers percuter duain ussa vegnir sfurzads si documents d'identidad biometrics. Expertas ed experts rendan attent a las mancanzas da segirezza gravantas da la tecnologia da RFID. Protecturas e protecturs da datas èn preoccupads.

Quest conclus federal chaschuna:

- custs supplementars per tut las burgaisas e per tut ils burgais (il passaport daventa pli char)
- custs supplementars per il viadi als centers da registrazion, pertge ch'il passaport e la carta d'identidad na pon betg pli vegnir dumandads en l'atgna visch-nanca da domicil
- ristgas da segirezza, perquai che las datas vegnan segiradas en in lieu central
- cumpetenzas federalas nunneccesarias tras las datas biometricas da las burgaisas e dals burgais
- intschertezzas davart la dumonda, cura e nua che las datas dal chip da RFID vegnan clamadas giu sco er nua che questas datas restan e vegnan utilisadas
- che la Svizra è in dals sulets pajais sin l'entir mund che sforza sias burgaisas e ses burgais da laschar registrar lur datas biometricas en ina banca da datas centrala
- in'extensiun dal stadi da surveglianza

### **En cas d'in NA n'è la cunvegna da Schengen BETG periclitada directamain.**

Il conclus federal va bler pli lunsch che las pretensiuns da Schengen.

**En cas d'in NA n'è la libertad da viagiar BETG periclitada.** Gnanc per entrar en ils Stadis unids vegni pretendì in passaport biometric. Per viagiar en ils Stadis unids senza passaport biometric dovran ins – sco per viagiar en blers auters pajais – simplamain in visum. Per dimoras da passa 90 dis en ils Stadis unids dovran ins dal rest in visum, er sch'ins ha in passaport biometric.

**Nus pretendain che mintga burgaisa e che mintga burgais possia decider er vinavant, sch'ella u sch'el vul in passaport biometric u in passaport convenziunal.** I n'è betg necessari d'introducir ina carta d'identidad biometrica e da segirar las datas en ina banca da datas centrala. Ni Schengen ni ils Stadis unids pretendan quai da la Svizra.

Ulteriuras infurmaziuns sut [www.freiheitskampagne.ch](http://www.freiheitskampagne.ch)

## Ils arguments dal cussegli federal

**La libertad da viagiar da las Svizras e dals Svizzers sco er l'aut  
nivèl da segirezza dal passaport svizzer duain esser garantids  
er en l'avegnir. Perquai vul la Svizra introducir definitivamain il  
passaport electronic. Il cussegli federal sostegna il project en  
spezial per ils sustants motivs:**

Il project permetta a la Svizra da cuntinuar cun la collavuraziun cun ses stadis partenaris europeics en il territori da Schengen. La Svizra sa segirescha uschia ils avantatgs ch'ella ha acquistà pir dacurt: la stretga collavuraziun da la giustia e da la polizia cun lur spessa rait cunter persunas criminalas; la clera regulaziun cunter dumondas multiplas en il sectur d'asil; e las facilitaziuns per il traffic da persunas transconfinal.

Garantir  
la libertad  
da viagiar

L'introducziun definitiva dal passaport electronic porta dentant er avantatgs ordaifer l'Europa. Ella è la premissa per che las Svizras e per ch'ils Svizzers possian viagiar er en l'avegnir senza visum en e tras ils Stadis unids. Per ils Stadis unids vala ina liberaziun da l'obligaziun da dumandar in visum numnadament mo per burgaisas e per burgais da stadis che emettan passaports electronics. In visum per ils Stadis unids custa oz var 170 francs. Cun l'introducziun definitiva dal passaport electronic salvain nus quella libertad da viagiar ch'è da gronda impurtanza per l'economia svizra, ma er per tut las Svizras e per tut ils Svizzers. Cun in «na» ristgain nus da perder ella.

Per il passaport electronic prevesa il conclus federal taxas favuraivlas per famiglias ed ina procedura d'emissiun effizienta. Uschia vegni ad esser necessari da sa drizzar mo ad in'autoritad, e sin basa da lur basegns pon ils chantuns decider, en quants lieus ch'il passaport electronic po vegnir dumandà. Grazia a quest proceder poi vegnir cuntinuà cun la purschida cumbinada da dumandar a medem temp ed en moda favuraivla il passaport electronic e la carta d'identitat. Il cussegli federal ha proponì ils sustants pretschs per il passaport electronic: 140 francs per persunas creschidas respectivamain 148 francs sco purschida cumbinada cun la carta d'identitat; 60 francs per

Procedura  
simpla, taxas  
favuraivlas  
per famiglias

uffants e per giuvenils respectivamain 68 francs sco purschida cumbinada.

Grazia a las datas biometricas electronicas en il passaport electronic daventi bler pli difficil d'utilisar en moda abusiva in passaport pers u engulà, cunquai che las datas permettan d'identifitgar la possessura u il possessor dal passaport en moda pli fidada che fin ussa. Uschia vegnan las personas protegidas cunter in abus da lur passaport e da lur identidad. Passa 50 stadis han gia introduci il passaport electronic e fin l'onn 2009 vegnan quai probablamain ad esser passa 90 stadis. Per ch'il nivel da segirezza dal passaport svizzer – ch'è fitg aut en la cumparegliazion internazionala – possia vegnir mantegni e per ch'il passaport svizzer possia salvar sia confidenza sin l'entir mund, duain las datas electronicas vegnir introducidas definitivamain er en il passaport svizzer.

La registraziun da la fotografia e da las improntas dals dets en il sistem d'infurmaziun svizzer per documents d'identidad (ISA) gida medemamain a proteger ils dretgs da las possessuras e dals possessurs dals passaports. Uschia po l'identidad da la petenta u dal petent vegnir controllada en moda pli fidada che fin ussa, cur ch'i vegn dumandà in nov document d'identidad. I daventa bler pli difficil d'obtegnair in document d'identidad tras fraud, inditgond ina faussa identidad.

Access a las datas personalas dal ISA han mo autoritads svizras, betg dentant autoritads estras. Il ISA serva sulettamain ad emetter ed a controllar ils documents d'identidad, in'utilisaziun per intents d'investigaziun è scumandada. Las mesiras per la protecziun da datas en il passaport electronic sco talas adempschan normas internaziunalas severas. Las datas èn protegidas cunter midadas e cunter lecturas nunautorisadas. Copiar las datas per falsifitgar in passaport electronic n'è betg pussaivel, perquai ch'ina tala emprova da falsificaziun vegniss remartgada immediatamain grazia a las numerosas caracteristicas da segirezza en il passaport svizzer. I n'è er betg pussaivel da localisar u da survegliar personas a maun dal passaport.

**Per tut quests motivs recumondan il cussegl federal ed il parlament d'acceptar quest project.**

L'abus  
vegn impedi

Registraziun  
centrala en  
l'interess da la  
segirezza

Protecziun  
maximala  
per las datas



## Text da votaziun

### Conclus federal

davart l'approvaziun e la realisaziun dal barat da notas  
tranter la Svizra e la communitad europeica  
concernent la surpigliada da l'ordinaziun (CE) nr. 2252/2004  
davart ils passaports ed ils documents da viadi biometrics

### (Svilup da l'acquist da Schengen)

dals 13 da zercladur 2008

*L'assamblea federala da la confederaziun svizra,*

sa basond sin ils artitgels 54 alinea 1 e 166 alinea 2 da la constituziun federala<sup>1</sup>,  
suenter avair gi invista da la missiva dal cussegl federal dals 8 da zercladur 2007<sup>2</sup>,  
*concluda:*

### Art. 1

<sup>1</sup> Il barat da notas dals 28 da mars 2008 tranter la Svizra e la communitad europeica concernent la surpigliada da l'ordinaziun (CE) nr. 2252/2004 dal cussegl dals 13 da december 2004<sup>3</sup> davart las normas per las caracteristicas da segirezza e davart ils elements biometrics dals passaports e dals documents da viadi che veggan emess dals stadis commembres vegg approvà.

<sup>2</sup> Tenor l'artitgel 7 alinea 2 litera b da la cunvegna dals 26 d'october 2004<sup>4</sup> tranter la confederaziun svizra, l'unio europeica e la communitad europeica davart l'associaziun da la confederaziun svizra a la realisaziun, a l'applicaziun ed al svilup da l'acquist da Schengen vegg il cussegl federal autorisà d'infurmà la communitad europeica davart l'adempilment da las premissas constituziunalas areguard il barat da notas tenor l'alinea 1.

### Art. 2

Las leschas federalas qua sutwart veggan midadas sco suonda:

### 1. Lescha dals 22 da zercladur 2001<sup>5</sup> davart ils documents d'identitat

*Art. 2 al. 1 lit. a, al. 2bis fin 2quater e 4*

<sup>1</sup> Il document d'identitat sto cuntregnair las suandantas datas:

a. *concerna mo il text franzos*

<sup>2bis</sup> Il document d'identitat po veggir munì cun in chip da datas. Il chip da datas po cuntregnair in maletg da la fatscha e las improntas dals dets da la possessura u dal possessur. Er las ulteriuras datas tenor ils alineas 1, 3, 4 e 5 pon veggir registradas sin il chip da datas.

<sup>1</sup> CS 101

<sup>2</sup> fegl uffizial federal 2007 5159

<sup>3</sup> fegl uffizial da las communidades europeicas L 385 dals 29 da december 2004, p. 1

<sup>4</sup> CS 0.360.268.1

<sup>5</sup> CS 143.1

<sup>2ter</sup> Il cussegli federal fixescha, tge tips da documents d'identitat che veggan munids cun in chip da datas e tge datas che duain vegin registradas sin quest chip.

<sup>2quater</sup> Plinavant po il document d'identitat cuntregnair ina identitat electronica per funcziuns d'autentificaziun, da signatura e da codaziun.

<sup>4</sup> Sin dumonda da la petenta u dal petent po il document d'identitat cuntregnair il num d'allianza, il num entaifer in urden religius, il num d'artista u d'artist ubain il num da partenadi sco er indicaziuns davart caracteristicas spezialas, sco impediments, protesas u implantats.

#### *Art. 2a Segirezza e lectura dal chip da datas*

<sup>1</sup> Il chip da datas sto vegin protegi cunter falsificaziuns e cunter ina lectura nunautorizada. Il cussegli federal fixescha las pretensiuns tecnicas correspondentes.

<sup>2</sup> Il cussegli federal è autorisà da far contracts cum auters stadiis davart la lectura da las improntas dals dets ch'en registradas sin il chip da datas, premess che questi stadiis hajan ina protecziun da datas ch'è equivalenta a la protecziun da datas svizra.

<sup>3</sup> El po autorisar las interpresas da transport, las gestiunarias ed ils gestiunaris d'exploits sco er auters posts adequats che ston verifitgar l'identitat d'ina persuna, da legger las improntas dals dets ch'en registradas sin il chip da datas.

#### *Titel da classificaziun avant l'art. 4*

#### **2. part:**

#### **Emissiun, producziun, privaziun e perdita dal document d'identitat**

#### *Art. 4 al. 1*

<sup>1</sup> Documents d'identitat veggan emess en Svizra tras ils posts che veggan designads dals chantuns. Il cussegli federal po designar ulteriurs posts. Sch'in chantun ha pliras autoritads emettentas, determinesch el ina da quellas sco post ch'è responsabel per emetter ils documents d'identitat.

#### *Art. 5 Dumonda d'emissiun*

<sup>1</sup> Tgi che vul in document d'identitat, sto sa preschenttar persunalmain en Svizra tar il post ch'è vegin designà dal chantun u a l'exterior tar la represchentanza svizra, ed inoltrar là la dumonda d'mitter in document d'identitat. Persunas minorennes e persunas avugadadas dovràn il consentiment en scrit da lur represchentanza legala.

<sup>2</sup> Il cussegli federal relascha disposiziuns davart la procedura da dumonda e d'emissiun, en spezial concernent:

- a. las datas che dastgan vegin utilisadas per emetter ils documents d'identitat e las funtaunas da questas datas;
- b. las pretensiuns che veggan fatgas a las autoritads emettentas;
- c. l'infrastructura tecnica.



<sup>3</sup> Resguardond las prescripcziuns internaziunalas e las pussaivladads tecnicas, po il cussegl federal prevair excepiuns da l'obligaziun da sa preschentar persunalmain.

*Art. 6 al. 1, 2 e 5*

<sup>1</sup> L'autoritat emettenta controllescha che las indicaziuns sajan correctas e cumpletas e verifitgescha l'identitat da la petenta u dal petent.

<sup>2</sup> L'autoritat emettenta decida davart la dumonda. Sch'ella approvescha l'emissiu dal document d'identitat, incumbensescha ella il post cumpetent da producir il document d'identitat. Ella al transmetta las datas necessarias.

<sup>5</sup> L'emissiu d'in document d'identitat vegn refusada, sche la petenta u sch'il petent fa ina dumonda a l'exterior, entant ch'ella u ch'el vegn persequità u è vegni sentenzià a l'exterior pervia d'in act chastiabel ch'è – tenor il dretg svizzer – in crim u in delict, e sch'igl èn avant maun motivs da supponer ch'ella u ch'el veglia mitschar da la persecuziun penal u da l'execuziun dal chasti. L'emissiu na vegn betg refusada, sche la sancziun smanatschada avess consequenzas che na fissan betg cumpatiblas cun l'urden public svizzer.

*Art. 6a Posts da producziun, interpresas generalas, furnituras e furniturs da servetschs e da rauba*

<sup>1</sup> Ils posts ch'èn incumbensads cun la producziun dals documents d'identitat e las interpresas generalas ston cumprovar:

- a. d'avair las enconuschientschas spezialisadas e las qualificaziuns necessarias;
- b. da garantir ch'els e ch'ellas produceschian ils documents d'identitat en moda segira, en auta qualitat, a temp e confurm a las specificaziuns;
- c. da garantir che la protecziun da datas vegnia observada; e
- d. d'avair avunda medis finanzials.

<sup>2</sup> Persunas cun dretg economics, possessuras e possessurs da quotas, commembras e commembers dal cussegl d'administraziun, d'in auter organ cumparegliabel u da la direcziun sco er autres personas che han u che pudessan avair ina influenza decisiva sin l'interresa u sin la producziun dals documents d'identitat, ston avair ina bona reputaziun. I pon vegnir fatgas controllas da segirezza en il senn da l'artitgel 6 da l'ordinaziun dals 19 da december 2001<sup>6</sup> davart las controllas da segirezza da personas.

<sup>3</sup> L'uffizi federal da polizia po dumandar da tut temp ils documents ch'èn necessaris per controllar las pretensiuns tenor ils alineas 1 e 2. Sch'il post da producziun fa part d'ina gruppera d'interpresas, valan questas pretensiuns per l'entira gruppera.

<sup>4</sup> Las disposiziuns dals alineas 1 fin 3 èn appligtgablas per las furnituras e per ils furniturs da servetschs e da rauba, sche las prestaziuns furnidas han ina impurtanza decisiva per la producziun dals documents d'identitat.

<sup>6</sup> CS 120.4

<sup>5</sup> Il cussegl federal fixescha las ulteriuras pretensiuns per ils posts da producziun, per las interpresas generalas sco er per las furnituras e per ils furniturs da servetschs e da rauba.

*Art. 6b Incumbensas da l'uffizi federal da polizia*

Ultra da las incumbensas ch'èn numnadas en questa lescha ed en las disposiziuns executivas ademplescha l'uffizi federal da polizia las suandantas incumbensas:

- a. surveglier che las prescripcions tenor l'artigel 6a veggian observadas;
- b. dar infurmaziuns ed instrucziuns als posts svizzers ed esters davart ils documents d'identidad svizzers, e quai cun resalva dals interess da mantegnair il secret e da proteger las datas;
- c. dar infurmaziuns a personas privatas davart ils documents d'identidad svizzers e davart l'emissiun da quels, e quai cun resalva dals interess da mantegnair il secret e da proteger las datas;
- d. dar infurmaziuns ed instrucziuns als posts da producziun ed a las interpresas generalas e surveglier che las specificaziuns veggian observadas;
- e. perseguitar il svilup internaziunal en il sectur dals documents d'identidad e surpigliar la responsabladad per la realisaziun dals standards internaziunals;
- f. manar l'infrastructura da clavs publicas (ICP) per ils documents d'identidad svizzers;
- g. manar il post spezialisà da la confederazion per documents d'identidad e da legitimaziun, e quai cun resalva da disposiziuns spezialas divergentas.

*Art. 9 al. 2*

<sup>2</sup> L'autezza da las taxas che veggian fixadas dal cussegl federal sto esser favuraivla per las famiglias.

*Art. 11 al. 1 frasa introductiva, lit. a ed al. 2*

<sup>1</sup> L'uffizi federal da polizia maina in sistem d'infurmaziun. Quest sistem cuntegna las datas persunalas che figureschan sin il document d'identidad e las datas persunalas registradas ed ultra da quai las suandantas datas:

- a. l'autoritat emettenta ed il post da producziun;
- <sup>2</sup> L'elavuraziun da datas serva ad emetter ils documents d'identidad sco er ad evitar che tals veggian emess nunautorisadament ed utilisads en moda abusiva.

*Art. 12 Elavuraziun e communicaziun da las datas*

<sup>1</sup> Per ademplir lur incumbensas legalas pon las suandantas autoritads u ils suandants posts endatar directamain datas en il sistem d'infurmaziun:

- a. l'uffizi federal da polizia;
- b. las autoritads emettentas;



- c. ils posts da producziun.

<sup>2</sup> Per ademplir lur incumbensas legalas pon las suandantas autoritads u ils suandants posts consultar datas dal sistem d'infurmazion tras la procedura d'invista:

- a. l'uffizi federal da polizia;
  - b. las autoritads emettentas;
  - c. il corp da guardias da cunfin, dentant exclusivamain per sclerir l'identitat;
  - d. ils posts da polizia ch'èn vegnidz designnads da la confederazion e dals chantuns, dentant exclusivamain per sclerir l'identitat;
  - e. ils posts da polizia ch'èn vegnidz designnads dals chantuns per registrar las annunzias da documents d'identidad pers;
  - f. il post da polizia da la confederazion ch'è vegni designà sco cumpetent per tractar quellas dumondas da sclerir l'identitat che veggan da l'exterior, dentant exclusivamain per sclerir l'identitat.

<sup>3</sup> Las datas dal sistem d'infurmazion dastgan vegnir dadas vinavant per identifitar victimas d'accidents, da catastrofas da la natira e d'acts da violenza sco er persunas sparidas. Las infurmaziuns ad ulteriuras autoritads sa drizzan tenor ils princips da l'agid uffizial.

<sup>4</sup> Las autoridades chèn cumpetas tenor l'alinea 2 literas c e d pon consultar las datas dal sistem d'infurmazion er a maun dal num e da las datas biometricas da la persuna respectiva tras la procedura d'invista, sche questa persuna na po betg preschentar in document d'identidad.

### *Art. 13 Obligaziun d'annunzia*

<sup>1</sup> L'autoritad da decisiu annunzia a l'autoritad emettent cumpetenta:

- a. la disposiziun d'ina bloccada dals documents sco er l'aboliziun da tala;
  - b. il deposit dal document d'identidad e la fin dal deposit;
  - c. las mesiras da protecziun per personas minorenas u per personas avugadas che sa refereschan a l'emissiun d'in document d'identidad sco er l'aboliziun da talas;
  - d. la perdita dal dretg da burgais tras lescha u tras in conclus da l'autoritat.

<sup>2</sup> L'autoridad emettenta endatescha las datas en il sistem d'infurmaziun da la conferderaziun.

Art. 16 Execuziun

Il cussegl federal regla l'execuziun da questa lescha. Sche necessari resguarda el las disposiziuns da l'uniu europeica e las recumandaziuns da l'organisaziju da l'aviatia civila internaziunala (OACI) davart ils documents d'identidad.

*Disposiziun transitorica da la midada dals 13 da zercladur 2008*

Suenter che la midada da questa lescha è entrada en vigur, pon las cartas d'identidad senza chip da datas vegnir dumandadas en Svizra durant maximalmain 2 onns tar la vischnanca da domicil sco fin ussa; ils chantuns fixeschan la data, a partir da la qua la las cartas d'identidad pon vegnir dumandadas mo pli tar las autoritads emettentas.

**2. Lescha federala dals 16 da decembre 2005<sup>7</sup> davart las personas estras**

*Art. 59 al. 4 fin 6*

<sup>4</sup> La registraziun da las datas biometricas e la transmissiun da las datas dals documents da viadi al post emettent pon vegnir transferidas dal tuttafatg u per part a terzas personas. L'artitgel 6a da la lescha dals 22 da zercladur 2001<sup>8</sup> davart ils documents d'identidad vala confurm al senn.

<sup>5</sup> Ils documents da viadi per personas estras pon vegnir munids cun in chip da datas. Il chip da datas po cuntegnair in maletg digitalisà da la fatscha e las improntas dals dets da la possessura u dal possessur. Er las ulteriuras datas tenor l'artitgel 111 alinea 2 literas a, c ed e pon vegnir registradas sin il chip da datas. L'artitgel 2a da la lescha dals 22 da zercladur 2001 davart ils documents d'identidad vala confurm al senn.

<sup>6</sup> Il cussegħ federal fixescha, tge tips da documents da viadi per personas estras che vegnan munids cun in chip da datas e tge datas che duain vegnir registradas sin quest chip.

*Art. 111 al. 1, 2 lit. a, 4 e 5*

<sup>1</sup> L'uffizi federal maina in sistem d'infurmaziun per emetter documents da viadi svizzers e permissiuns da return per personas estras (ISR).

<sup>2</sup> Il ISR cuntegna las suandardas datas:

- a. il num, ils prenum, la schlattaina, la data da naschientscha, il lieu da naschientscha, la naziunalitat, l'adressa, la grondezza, ina fotografia da la fatscha, las improntas dals dets, il num ed ils prenum dals geniturs, il num dals geniturs avant che maridar, la suttascripcziun, il numer dal dossier ed il numer personal;

<sup>4</sup> Las datas ch'èn vegnidas registradas sin basa da l'alinea 2 vegnan elavuradas da collavuraturas e da collavuraturas da l'uffizi federal che han l'incumbensa d'emetter documents da viadi svizzers e permissiuns da return.

<sup>5</sup> Tras ina procedura d'invista po l'uffizi federal porscher a las suandardas autoritads u als suandardas posts in access a las datas ch'èn vegnidas registradas sin basa da l'alinea 2, sche quellas u sche quels basegnan questas datas per ademplir lur incumbensas:

- a. *concerna mo il text franzos e talian*
- b. e c. *concerna mo il text franzos*

<sup>7</sup> CS 142.20

<sup>8</sup> CS 143.1



### **Art. 3**

<sup>1</sup> Quest conclus è suttamess al referendum facultativ tenor ils artitgels 141 alinea 1 litera d cifra 3 e 141a alinea 2 da la constituziun federala cunter ils contracts internaziunals, ils quals cuntengnan disposiziuns impurtantas che fixeschan normas da dretg u dals quals la realisaziun pretenda ch'i vegnian relaschadas leschas federalas.

<sup>2</sup> Il cussegħ federal fixescha la data da l'entrada en vigur da las leschas federalas ch'èn enumeradas en l'artitgel 2.







**PP**  
**Spediziun postala**

Trametter enavos a la controlla  
d'abitants da la vischnanca

**Recumandaziun  
a las votantas ed als votants**

Il cussegl federal ed il parlament recumondan a las votantas ed als votants da votar ils 17 da matg 2009 sco suonda:

- Gea a l'artitgel constituziunal «In futur cun la medischina cumplementara» (cuntraproject tar l'iniziativa dal pievel «Gea a la medischina cumplementara» ch'è vegnida retratga)
- Gea a l'introduciun da datas biometricas electronicas en il passaport svizzer ed en documents da viadi per persunas estras (midada da la lescha federala davart las persunas estras)

Fin da redacziun:  
11 da favrer 2009

Ulteriuras infurmaziuns sut:  
[www.admin.ch](http://www.admin.ch)  
[www.parlament.ch](http://www.parlament.ch)  
[www.ch.ch](http://www.ch.ch)

868001535

Edì da la chanzlia federala